

Shamsiah Fakeh: Nasionalis atau Ahli Politik?

Datuk Prof Dr.Hjh.Ramlah Adam

1

Universitii Teknologi MARA (UiTM)

Nama Shamsiah Fakeh tidak asing lagi kepada peminat dan pengkaji sejarah politik negara. Pemergiannya pada 20 Oktober 2008 lalu adalah pemergian seorang aktivis politik yang mempunyai pelbagai liku dan warna corak politiknya. Ada pihak yang menganggapnya sebagai nasionalis dan ada juga yang menganggapnya penderhaka negara. Yang mana satu benar? Mungkin fakta sejarah dan interpretasi yang berdasarkan fakta sejarah yang betul dapat menjernekan keadaan.

Shamsiah dilahirkan di Negeri Sembilan dan mendapat pendidikan agama di Sekolah Tinggi Agama di Padang, Sumatra. Beliau kemudian melibatkan diri dalam politik kerana terpengaruh dengan kegiatan menentang Belanda di Padang, Sumatra disekitar 1930an dan awal 1940an. Kegiatan menentang Belanda memang merupakan satu kegiatan anak negeri menentang penjajahan impereal barat yang telah berlalu sejak awal kurun 19. Sumatera utara, terutama Aceh terkenal dengan Perang Paderi yang berlangsung selama beberapa dekad; maka asas kebencian kepada Belanda memang telah mendarah daging masyarakat Minangkabau. Gerakan membebaskan Sumatera dari penjajahan Belanda pada 1930an adalah kelangsungan daripada gerakan tersebut. Maka sesiapa sahaja yang belajar ditanah kandung keluarga mereka tidak akan terlepas daripada semangat itu. Inilah yang berlaku kepada Shamsiah Fakeh, Aishah Ghani, Dr. Burhanuddin Al-Helmy, Ahmad Boestamam dan Khadijah Sidek, iaitu diantara nama-nama tersohor yang menjadikan Semenanjung Tanah Melayu sebagai tapak politik mereka. Oleh itu setiap kegiatan politik mereka berteraskan kehebatan dan keagungan Sumatera dan kemudian Indonesia.

Shamsiah Fakeh telah menggantikan Aishah Ghani, kawan sepengajiannya di Sumatera sebagai Ketua AWAS (Angkatan Wanita Sedar) iaitu sayap wanita Parti Kebangsaan Melayu Malaya (PKMM) atau **Malay Nationalist Party**. Parti ini telah ditubuhkan oleh Parti Komunis Malaya melalui Arshaad Ashaari, Bendahari Parti Komunis Malaya, yang menyamar sebagai nasionalis Melayu. Beliau yang telah mengambil alih **Suara Rakyat**, akhbar yang dikendalikan oleh Ahmad Boestamam di Ipoh, telah mencadangkan penubuhan Parti Sosialis Malaya untuk menjadi wadah perjuangan orang Melayu menentang British. Ini dibantah oleh Ahmad Boestamam yang bimbang penolakkan orang Melayu yang terkenal dengan sikap konservatif dan masih percaya kepada institusi raja Melayu. Maka dinamakan PKMM supaya ia benar-benar dapat dilihat sebagai parti yang memperjuangkan kepentingan bangsa Melayu. Presidennya adalah Mokhtaruddin Lasso, seorang ahli Parti Komunis Indonesia, yang datang ke Tanah Melayu untuk menyebarkan fahaman komunis dikalangan masyarakat Melayu dan Indonesia di Tanah

Melayu. Dengan menguasai pentadbiran ketenteraan Tanah Melayu selama 13 hari selepas penyerahan Jepun pada akhir 1945, memang membolehkan pihak Kominis Comintern Antarabangsa dan Parti Kominis Malaya dibawah Setia Usaha Agongnya Chin Peng, merancang kegiatan politik mereka. Bagi PKM Tanah Melayu mahu dijadikan sebagai jajahan ke 20 Republik Rakyat China Kominis. Ini memang tertulis dalam dokumen-dokumen kominis yang dijumpai dalam kubu-kubu kegiatan PKM di hutan-hutan Tanah Melayu. Walaupun British sebagai penjajah tetapi dokumen bahasa Cina, Melayu dan Inggeris ini tidak boleh ditolak sebagai bukti sejarah.

2

Penyerapan PKM dalam masyarakat Melayu bukan sahaja melalui akbar, parti politik tetapi juga melalui kegiatan-kegiatan penyamaran dan pergaulan mereka yang amat bebas didalam masyarakat Melayu. Mereka hidup bergaul seperti abang dan adik, memakai pakaian Melayu, makan makanan Melayu dan ada yang berkahwin dengan perempuan Melayu. Pemimpin-pemimpin Melayu dalam PKM juga berkahwin dengan anggota wanita PKM. Ini melahirkan satu keadaan yang amat menyakinkan diantara kedua belah pihak. Ini juga memudahkan mereka bergaul dan mendapat kepercayaan daripada masyarakat Melayu, terutama dikawasan-kawasan pendalaman yang tidak mudah dihubungungi. Kampong-kampong terpencil didaerah pendalaman menjadi sasaran mereka. Hutan-hutan yang mengelilingi kampong-kampong tersebut memudahkan PKM keluar masuk kampong tanpa ada sekatan. Malah satu kes yang sangat ekstrem ialah seorang pemimpin kanan PKM yang mengaku seorang Islam dan menggunakan nama Haji Hashim. Dia memang dipercayai oleh orang kampong sebagai seorang Islam kerana kebolehannya dalam bidang agama Islam, tetapi nama sebenarnya adalah Chong Yin Nam. Dia dapat ditewaskan pada Januari 1950.

Parti Kominis Malaya juga demi untuk meyakinkan orang Melayu bahawa perjuangan ini adalah untuk menentang British telah menubuhkan satu regiment khas untuk orang Melayu, yang dinamakan **Regimen 10**. Regimen ini diasaskan oleh Mokhtaruddin Lasso tetapi kepimpinannya diberikan kepada Abdullah C.D. Dalam pasukan inilah semua orang Melayu dikumpulkan dan diberi latihan ketenteraan dan teori-teori politik. Pusat kegiatan mereka disekitar Temerloh, Raub dan Kuala Lipis. Di Selangor, di Kg. Jenderam juga diadakan kegiatan yang sama oleh PKM. Seorang responden wanita yang umur 13 tahun di waktu itu telah menerangkan bahawa beliau dan pemuda-pemudi kampongnya telah mendapat latihan senjata dan kuliah-kuliah anti British pada setiap pagi dan petang dalam hutan berhampiran kampongnya. Dia juga bersekolah agama rakyat di Kampong Jenderam. Aishah Ghani juga dalam memoirnya mengaku semasa menjadi wartawan ruangan wanita **Pelita Malaya**, akhbar PKMM di Kuala Lumpur, telah tinggal seminggu di perkampungan Cina di Ampang, sedangkan Arshad Ashaari, Ahmad Boestamam dan beberapa pemimpin PKMM yang lain masuk kedalam hutan dan hanya keluar seminggu selepas itu. Di pejabat akhbar tersebut Arshad sentiasa mengagongkan Kominisme. Aishah meninggalkan PKMM untuk belajar dalam bidang kewartawan diluar negara. Shamsiah Fakeh, yang menggantikan Aishah Ghani sebagai Ketua AWAS, kemudian berkahwin dengan Ahmad Boestamam, Ketua Pemuda API (Angkatan Pemuda Insaf). Ini

bermaana terdapat hubungan dan kerjasama yang amat erat di antara PKM , PKMM,AWAS dan API sebagai satu pasukan politik yang mampan .

3

Bukan sahaja dihutan PKM bergerak.Dibandar-bandar juga menjadi medan kegiatannya;Singapura menjadi ibunya manakala K.Lumpur,Seremban,Ipoh dan Kuantan menjadi pusat kegiatannya.Disini kerjasama dan penyerapan pengaruh PKM kedalam pertubuhan-pertubuhan bukan kerajaan,parti politik dan persatuan-persatuan pemuda, wanita ,kesatuan sekerja dan sekolah malam Cina adalah sangat jelas sekali.Gerakan PKM ini mendapat sokongan dan kerjasama dengan jelas daripada All Council of Joint Action(AMCJA),Malayan Labour Party,Malayan Party,Women Leuge Association,Youth Leuge Association dan kesatuan-kesatuan sekerja.Mereka secara kolektif menentang British,UMNO dan Raja-raja Melayu yang sedang berunding untuk menubuhkan Persekutuan Tanah Melayu melalui Perjanjian Persekutuan 1948 bagi menggantikan Malayan Union.Pihak PKM dan sekutunya mahu supaya kerakyatan secara jus soli Malayan Union diterima sedangkan UMNO dan Raja-raja Melayu mahu kekalkan status quo politik Melayu sebelum Perang Dunia Kedua.British,kerana faham dengan agenda perjuangan PKM,telah menolak PKM dan sekutunya,tetapi sebaliknya bekerjasama dengan UMNO dan Raja-Raja Melayu.Inilah yang menaikkan kemarahan PKM sehingga mengangkat senjata awal 1948.Chin Peng dan PKM bertanggungjawab kepada perancangan secara ketenteraan satelah gagal menjalankan kegiatan politiknya melalui perlembagaan.

British mengistiharkan **Undang-undang Darurat** pada bulan Jun 1948.Dengan itu terharamlah semua parti politik yang menentang British.Bukan sahaja PKM dan kesatuan sekerja yang militant,tetapi juga Parti Kebangsaan Melayu Malaya(PKMM).Namun semasa membuat kajian,didapati banyak pihak yang terlibat dan mereka yang bersimpati dengannya,telah menyalahkan UMNO dan Dato' Onn,Presidennya, apabila ramai pemimpin PKMM ditangkap atau melarikan diri kedalam hutan.Ramai juga diantara mereka apabila menulis memoir satelah keluar daripada hutan dan tinggal diluar Malaysia dan tidak kurang juga yang tinggal di Malaysia, melihat UMNO sebagai `anjing penjajah`,`tali barut atau pengampu penjajah` dan menyalahkan UMNO kerana mereka ditangkap.Mereka bukan `bunga jarak bunga jagong ,berani buat berani tanggung".Pemilihan ideology politik adalah hak mereka;mereka sangat yakin dengan kerjasama itu dan sanggup diperkudakan oleh PKM demi untuk mendapat kejayaan politik mereka bersama;tetapi mengapa pula menyalahkan orang lain apabila kecewa.?

Gerakan menentang penjajah British bukan baru dalam sejarah negara ini.Ia juga bukan dimulai oleh PKM atau PKMM dan sekutunya.Gerakan itu telah ada sejak kurun 19 dibawah Dol Said,Maharaja Lela,Bahaman dan kemudian pada kurun 19 dibawah Abdul Rahman Embong,Tok Janggut dan lain-lainnya.Di Srawak pula dibawah nama Sharif Mashhor,Rentap dan lain-lain kegiatan menantang James Brook telah berlaku bertali arus.Di Sabah pula dibawah Mat Salleh dan ramai lagi pejuang anak negeri telah memperlihatkan hal yang sama.Dalam fasa kedua gerakan kebangsaan lebih bersifat sederhana melalui gerakan Islah,persatuan-persatuan sosial,bahasa dan sastera.Hanya selepas Perang Dunia Kedua,gerakan perjuangan itu bersifat

politik melalui pertubuhan parti-parti politik dan idea menentang penjajah seperti PKMM dan UMNO. Oleh itu tidak siapapun boleh mendabik dada menobatkan diri sebagai perintis atau pembela bangsa dan negara kecuali kesemua pihak yang telah menjadi pendokong kegiatan itu secara bergilir-gilir sejak kurun 19.

4

Namun, untuk menjadi seorang nasionalis atau parti nasionalis, pendekatan dan matlamat perjuangan mestilah berasas kepada kebangsaan bangsa itu dan mempunyai matlamat untuk kemerdekaan tanah airnya sebagai sebuah negara yang berdaulat dan ditadbir oleh anak bangsanya sendiri. Ini semua dicapai melalui proses 'self-determination' yang kukuh dan didokong oleh anak negeri itu sendiri. Jika ini dijadikan kayu ukur, ternyata terdapat pendekatan dan matlamat yang amat berbeza diantara kedua kumpulan politik diatas. Seperti diatas PKMM adalah tajaan PKM, tetapi UMNO adalah tajaan orang Melayu daripada seluruh Semenanjung yang berkongres di Kuala Lumpur pada Mac 1946. Ada pihak mengatakan UMNO ditaja oleh British, tetapi campertangan British itu tidak begitu jelas seperti sejelas Ahmad Boestamam menulis campertangan PKM menubuhkan PKMM di Ipoh pada 17 Ogos 1945. Pihak British meneruskan rancangan Malayan Unionnya pada 1 April 1946 sedangkan UMNO ditubuhkan pada 11 Mei 1946; Raja-raja Melayu dan UMNO tidak menyokong Malayan Union dan tidak hadir dalam perlantikan Edward Gent sebagai Gabenor Malayan Union tetapi PKMM dan PKM menyokong penubuhan Malayan Union dan hadir didalam majlis itu. Orang Melayu yang menyokong penubuhan UMNO mempunyai slogan 'Tanah Melayu untuk Melayu', satu pernyataan kebangsaan yang amat jitu; ia tidak mahu berkongsi dengan sesiapa dan melihat perjuangannya adalah untuk tanah airnya sendiri. Dato' Onn dan UMNO menolak gabungan dengan Indonesia sejak awal lagi. Sedangkan itulah cita-cita tersirat Kesatuan Melayu Muda (KMM), abang PKMM, API dan AWAS.

UMNO juga tidak diperkudakan oleh British; penentangan mereka kepada Malayan Union adalah jelas sekali; mereka tidak mengangkat senjata tetapi telah berunding dengan British dan mengadakan rapat-rapat umum secara aman untuk membantah Malayan Union dibandar-bandar besar. Mereka juga menghantar surat bantahan ke Pejabat Tanah Jajahan mengutuk Malayan Union. Mereka tidak didalangi oleh unsur-unsur militant. Dr. Burhanuddin dan PKMM menjadi anggota UMNO menubuhkan UMNO pada 11 Mei 1946, tetapi tiga bulan kemudian keluar daripada UMNO dan bekerjasama secara aktif dengan PKM. Maananya, bukan PKMM dan para pemimpinnya termasuk Shamsiah Fakeh tidak sedar apa yang berlaku tetapi sebaliknya terus mengikut telunjuk PKM, yang menjadi penajanya. Apabila British membubarkan Malayan Union, itulah tanda kekalahan PKMM dan PKM untuk mendapat sokongan British dan orang Melayu yang lebeh besar jumlahnya didalam UMNO daripada dalam PKMM. Sebab itulah kemarahannya kepada UMNO yang dianggap 'anjing penjajah' tidak dapat dibendungnya, tambahan pula apabila pemimpin-pemimpin utamanya seperti Ahmad Boestamam, Abu Bakar Al-Baqir dan 140 yang lain ditangkap dibawah Undang-undang Darurat 1948.

Dalam keadaan inilah Shamsiah Fakeh masuk kedalam hutan. Beliau semasa itu telah berkahwin dengan Wahi Anuar, pemimpin **PETA** (Ikatan Pembela Tanah Air) daripada Pahang. Shamsiah telah menggerakkan **AWAS** dikalangan wanita Melayu di Lubuk Kawah, Temerloh. Penduduk dikawasan disekitarnya ini memang terkenal sebagai penyokong dan anggota Rejimen 10. Dengan itu kerjasama **AWAS** dan Rejimen 10 tidaklah menghairankan. Shamsiah dan suaminya Wahi Anuar ikut serta gerombolan **PKM** itu. Mereka bergerak kedalam hutan bagi menentang terus British dan menolak **UMNO** yang dianggap kolot dan tidak revolusioner. Inilah pendirian Shamsiah Fakeh.

Pendiriannya ini berbeza dengan Dr. Burhanuddin al-Helmy, pemimpin **PKMM** yang menggantikan Mokhtaruddin Lasoo yang dikatakan telah kembali ke Jawa. Dr. Burhanuddin tidak masuk kedalam hutan, beliau sebaliknya pindah ke Singapura kerana di sana **PKMM** masih lagi halal. Cuma apabila beliau terlibat dalam demonstrasi menentang tindakan Mahkamah Tinggi Singapura menjadikannya selua seorang kristian, maka barulah dia dipenjarakan oleh British. Beliau menerimanya dan tidak melarikan diri dan mengikut ajakan **PKM**. Beliau kemudian menjadi pemimpin **PAS** pada 1956 sehingga keakhir hayatnya pada 1969.

Begitu juga dengan Ahmad Boestamam. Beliau telah ditangkap oleh British dan dipenjarakan selama 7 tahun di Penjara Changi, Singapura. Beliau mungkin tidak ada pilihan kerana telah ditangkap dengan serta merta; ini kerana kedudukan dan penglibatannya yang amat jelas dalam menentang British melalui pendekatan 'Merdeka Dengan Darah', slogan **API**. Bagi British ini sangat militant dan merbahaya. Namun selepas bebas daripada penjara, Ahmad Boestamam meneruskan kegiatan politiknya secara halal dengan menubuhkan Parti Rakyat Malaya pada tahun 1955; dan dia terus bergiat dalam politik Malaysia sehingga persaraannya kerana keuzorannya disekitaran 1980an.

Shamsiah Fakeh masuk ke hutan kerana suaminya Wahi Anuar juga masuk kedalam hutan. Tetapi Wahi Anuar menyerah diri pada akhir tahun 1950. Tetapi tidak Shamsiah Fakeh. Dia terus menetap dalam hutan dan berkahwin dengan Ibrahim Mahmud, rakan seperjuangannya. Ini bermaana Shamsiah tetap yakin dengan pendekatan dan matlamat perjuangannya; dia boleh memilih keluar mengikut Wahi Anuar; tetapi sebaliknya terus bergerak bersama anggota Rejimen 10 dan anggota **PKM** yang lain kesempadan Malaysia-Thailand kerana sentiasa diburu oleh pasukan British, Australia, India, Ghurga, Ashkar Melayu dan lain-lain pasukan keselamatan. Mereka akhirnya tiba kesempadan pada 1953 setelah banyak yang terkorban kerana serangan bersenjata, kekurangan makanan, sesat dan hilang begitu sahaja. Ketua Penerangan Rejimen 10, Ibrahim Chik, juga dari Temerloh Pahang terpisah dengan isterinya selama 12 tahun kerana tersesat didalam hutan belantara. Ramai juga yang menyerah diri tetapi Shamsiah Fakeh dan suaminya tetap tegas dengan pendiriannya. Ini adalah pilihannya.

Proses untuk mendapat kerajaan sendiri dan kemerdekaan negara mula dilakukan pada 1955. Pilihanraya untuk memilih kerajaan bagi menuntut kemerdekaan telah dibuat pada Julai

1955.Tengku Abdul Rahman sebagai Ketua Menteri telah bertemu dengan Parti Komunis Malaya yang diketuai oleh Chin Peng dan diikuti oleh Rashid Maidin di Baling, Kedah selepas memenangi pilihanraya tersebut.Pertemuan sehari itu tidak menghasilkan apa-apa kecuali ketegasan PKM untuk terus bergerak;PKM menolak perletakan senjata,pengampunan bersyarat dan enggan membubarkan parti seperti cadangan kerajaan Parti Perikatan.Keputusan PKM ini diakui oleh Shamsiah Fakeh dan semua penyokong PKM walaupun dimata mereka jelas sekali rakyat Persekutuan Tanah Melayu daripada perbagai bangsa telah memilih demokrasi berparlimen dan raja berperlembagaan sebagai modus operandi pentadbiran negara.

Shamsiah Fakeh sedar dengan semua perkara ini.Sebab itu pada tahun 1956,beliau dan suaminya memilih untuk menjadi tetamu Parti Komunis China dan bertuankan Mao Tze Tung,pemimpin Komunis dunia yang sangat terkenal itu.Alasannya berhijrah ke China kerana beliau dihantar untuk belajar selok belok Kominisme untuk membolehkan lebih ramai orang Melayu dapat ditarik dalam PKM.Alasan ini membuktikan bahawa beliau memang tetap yakin dan kagum dengan fahaman itu dan Mao Tze Tung sedangkan negara tanah kelahirannya sedang bergerak mencapai kemerdekaan.

Dalam satu pertemuan saya dengan Rashid Maidin di Weng,Thailand,iaitu perkampungan baru yang dikhaskan untuk bekas-bekas anggota PKM,saya bertanya kepada Rashid Maidin,yang ketika itu telah berusia dalam lingkungan 70an.Soalan saya:

‘Perjuangan Pak Rashid ialah untuk menuntut kemerdekaan Tanah Melayu;tetapi mengapa tidak menyokong kemerdekaan pada 1957?’.

Dia hanya tersenyum sumbing.Mungkin dia malas menjawab atau jawapannya itu akan menimbolkan polimek.Susah nak diduga.Tetapi diujung pertemuan dia membisikkan dengan perlahan:‘Bukan seperti kehendak kami’.Sayang sekali;kaki saya telah melangkah masuk kedalam van yang membawa kami datang dan akan membawa kami pulang ke Malaysia.Namun,kata-katanya cukup memperlihatkan inti dan semangat perjuangan lamanya tetap tersemat dihatinya.Begitu juga dengan Shamsiah Fakeh dan suaminya.Semasa pengistiharan kemerdekaan di Stadium Merdeka pada 31 Ogos 1957,beliau berada dan menetap di China.

Sifat patriotik atau nasionalime juga tidak pernah muncul dalam tahun 1960an.Pada 1965,beliau dan suaminya telah dihantar untuk membantu Parti Komunis Indonesia yang sedang berkuasa melalui S.M.Aidit,setia usaha agong PKI dan S.Subandrio ,Menteri Luar Indonesia.Dibawah pengaruh mereka ini Sukarno mengamalkan NASAKOM(Nasionalisme,Sosialisme dan Kominisme)sebagai dasar pentadbirannya.Dimasa itu juga Sukarno telah menjalankan dasar **Ganyang Malaysia** kerana tidak bersetuju dengan pembentukan Malaysia pada 16 September 1963.Sukarno melihat penubuhan Malaysia adalah satu neo-colonialisme tajaan blok barat iaitu British,Amerika Syarikat dan United Nation.Gabungan daerah-daerah diutara Pulau Borneo dilihat sebagai satu tandingan kepada keselamatan dan keagongan Indonesia yang selama ini

adalah negara yang terbesar dan terluas wilayahnya di kepulauan Asia Tenggara ini. Namun apa yang lebih penting ialah kuasa barat akan terus dapat memantau dan mengawal aspek keselamatan, perdagangan dan perlombongan kawasan ini walaupun mereka bukan lagi penjajah. Dengan itu pengaruh Komunisme tidak akan dibenarkan menguasai kawasan ini. Inilah salah satu sebab penting mengapa Malaysia ditubuhkan oleh British.

7

Shamsiah Fakeh menjadi penyokong kepada Gerakan Ganyang Malaysia itu. Sebagai pemimpin sebuah pertubuhan yang dinamakan **Liga Pembebasan Nasional Malaya**, yang ditubuhkan khas untuk menjalankan propaganda menentang Malaysia, Shamsiah Fakeh telah memainkan peranannya dikalangan kaum wanita Indonesia; ini adalah salah satu strategi perang saraf yang telah dilaksanakan. Bukan dia sahaja yang terlibat tetapi juga tokoh-tokoh politik seangkatan dan seperjuangan dengannya ditahun 1945 dalam PKMM dan PKM. Samaada mereka yang tinggal di Indonesia ataupun yang masih tinggal di Malaysia, mereka bersama-sama menentang penubuhan Malaysia dengan alasan yang pelbagai tetapi tetap sama-sama bergerak menentang Malaysia.

Salah seorang daripadanya ialah Ibrahim Haji Yaakob, pemimpin Kesatuan Melayu Muda (KMM) dan Kesatuan Rakyat Indonesia Semenanjung (KRIS) yang telah pun mendapat naungan politik di Indonesia pada tahun 1945. Beliau ke Indonesia kerana semasa Jepun berkuasa di Tanah Melayu (1942-1945) Ibrahim adalah ketua orang Melayu yang bersekongkol dengan Jepun untuk membawa Tanah Melayu merdeka dibawah Indonesia Raya (atau Melayu Raya). Ibrahim telah pun berunding dengan Sukarno; Sukarno serta Hatta telah pun melawat Ibrahim dan Dr. Burhanuddin di Taiping untuk membuat perundingan itu. Pengistiharan kemerdekaan Indonesia bersama Tanah Melayu itu telah dirancang pada 17 Ogos 1945; tetapi ini tidak kesampaian kerana Sukarno dan rakan-rakannya telah mengistiharkan kemerdekaan Indonesia pada 15 Ogos 1945, iaitu pada hari penyerahan diri tanpa syarat pihak Jepun kepada pihak Bersekutu. Ibrahim yang bimbang ditangkap telah pergi ke Indonesia pada hari yang sama. Beliau kemudian dilantik sebagai orang penting dalam pentadbiran dan ketenteraan Indonesia.

Pada tahun 1960-1967 Ibrahim dilantik sebagai **Ahli Majlis Permesyuaratan Rakyat Riau**. Ini memberi peluang kepadanya untuk memberi nasihat dan membuat perancangan menentang Malaysia dari daerah Indonesia yang paling hampir dengan Semenanjung. Pasokan-pasokan tentera Indonesia yang mendarat didaerah-daerah pantai Johor adalah dari Riau. Pengalaman dan kedudukan Ibrahim sebagai Leftenan-Kernel Tentera Indonesia di Jogjakarta, petugas khas bagi Jaksa Agung Republik Indonesia, di Heque, Belanda, Ketua Cawangan Parti Nasional Indonesia bagi Daerah Jakarta Pusat dan tuan punya Bank Pertiwi, tentulah meyakinkan kesetiannya yang tidak berbelah bagi kepada Indonesia. Malah semasa beliau berjumpa dengan Tengku Abdul Rahman pada 1955 di Jakarta, Ibrahim dengan tegas memberitahu Tengku bahawa konsep Melayu Raya atau Indonesia Raya adalah yang terbaik bagi politik Melayu. Pendirian yang berbeza dengan Tengku Abdul Rahman itu telah memisahkan kesetiaan Ibrahim kepada

tanah kelahirannya,Tanah Melayu. Ibrahim menjadi salah seorang tokoh yang terlibat dengan usaha untuk menjatuhkan Malaysia.Adakah itu sikap seorang nasionalis?

8

Begitu juga dengan Ahmad Boestamam,bekas pemimpin API.Ahmad Boestamam yang menjadi Ahli Parlimen bagi Gombak Selatan akibat kemenangannya dalam Pilihanraya 1959 diatas tiket **Malayan Socialist Front**(gabungan Parti Rakyat Malaya dan Parti Buruh Malaya), juga terlibat dalam usaha menentang penubuhan Malaysia.Dalam negara,Ahmad Boestamam menolak penubuhan Malaysia apabila dibahaskan dalam Dewan Rakyat pada Oktober 1961.Beliau menolak cadangan itu kerana ia tidak sama dengan Melayu Raya yang menjadi impiannya selama ini.Baginya Malaysia tidak akan lengkap jika tidak menyatukan semua negara yang mempunyai rumpun Melayu,terutamanya Indonesia.Keduanya beliau mahu kemerdekaan negeri-negeri tanah jajahan British itu diberikan dahulu dan mereka diberi peluang menentukan hala tuju politik mereka sendiri.

Pendirian Ahmad Boestamam ini selari dengan Parti Rakyat Singapura dan **Parti Rakyat Brunei** yang merupakan sambungan Parti Rakyat Malaya yang dipimpinya.Tetapi kerjasama yang paling jelas adalah diantara beliau dan partinya dengan pemimpin Parti Rakyat Brunei. Yang mempunyai pendirian yang selari.A.M.Azahari berharap satu konfederasi dibuat dengan Brunei sebagai ketuanya kerana disegi sejarah , kedua-dua negeri itu adalah jajahan Kesultanan Brunei.Akibat daripada penentangan itu,**A.M.Azahari** dan partinya telah mengangkat senjata menentang British dan Sultan Brunei pada 1962.Gerakan ini dapat diatasi dan Azahari berlindung dibawah kerajaan Indonesia.Ahmad Boestamam pula ditahan pada 1963 dibawah ISA.Beliau dituduh bekerjasama dengan Parti Komunis Indonesia untuk menjatuhkan Malaysia dan membantu Pemberontakan Brunei 1962.Perjuangan secara gerila berlaku diatas nama Tentera Kalimantan Utara dengan Pihak Komunis Indonesia menyerap masuk kedalam pertubuhan ini sehingga menyebabkan gerakan membasmi Komunis berlaku di Srawak pada 1960an dan 1970an.

Ternyata Gerakan Ganyang Malaysia ini bukan sahaja melibatkan Shamsiah Fakeh,Ibrahim Yaakob dan Ahmad Boestamam,tetapi juga Dr.Burhanuddin Al-Helmy,Presiden PAS dan bekas pemimpin PKMM.Penglibatan beliau dikatakan lebih serius.Dalam satu laporan sulit yang dikenal sebagai **A Plot Is Exsposed**,Dr.Burhanuddin bersama-sama dengan Dato' Raja Abu Hanifa,Ishak Hji Mohamad, Hasnol Hadi,Dato' Kampo Rajo dan Husein Yaakob telah berusaha untuk menubuhkan sebuah kerajaan buangan di Indonesia iaitu di Riau.Mereka merancang untuk menggunakan Persidangan Afro Asia di Kharachi bagi membuat semua hubungan dengan Indonesia melalui R.M.Soenita,ejen Parti Komunis Indonesia.Manakala Husein Yaakob adalah ejen Indonesia di K.Lumpur.Semua perancangan ini berlaku disekitar 1965 iaitu kemuncak gerakan Ganyang Malaysia.Sebelum 1965,dalam Dewan Rakyat,Dr.Burhanuddin secara terbuka telah menentang penubuhan Malaysia atas dasar yang sama dengan Ahmad Boestamam.Mesyuarat Agong PAS juga menyokong usul cadangan Hassan Adli untuk menolak pebubuhan Malaysia di Dewan Rakyat.Bagaimanapun,Dr.Burhanuddin telah hilang haknya

sebagai Ahli Parlimen apabila beliau didapati bersalah oleh mahkamah kerana pecah amanah dalam Syarikat Malay-German Shipping Company.Kekecewaannya itu dilihat sebagai sebab beliau bekerjasama dengan Indonesia untuk menentang Malaysia.Pada 28 Januari Dr.Burhanuddin ditangkap,iaitu beberapa hari selepas beberapa orang kawannya dan ejen-ejen Indonesia tangkap di Singapura.Dr.Burhanuddin ditahan dibawah ISA sehingga 1969.

9

Ternyata dari semua pengkesahan diatas dapat dilihat satu usaha dan gerakan yang berterusan oleh Shamsiah Fakeh dan kawan-kawannya dalam menegakkan fahaman politik serta keyakinan mereka sejak 1945 sehinggalah 1960an.Perjuangan mereka untuk menegakkan fahaman komunis dan Melayu Raya tetap konsisten.Jika semasa British menjadi penjajah Tanah Melayu,alasan Shamsiah Fakeh bersama-sama kawan-kawannya agak jelas iaitu menentang penjajahan British di Tanah Melayu.Tetapi,apabila Persekutuan Tanah Melayu mencapai kemerdekaan,Shamsiah Fakeh dan kawan-kawan seangkatan dengannya tetap memilih untuk berjuang dibawah bendera Parti Komunis Malaya dan berlindung dibawah Parti Komunis China.Malah semasa Malaysia ditubuhkan sekali lagi pendirian politik Shamsiah Fakeh dan kawan-kawannya sangat jelas.Mereka bersama-sama dengan Presiden Sukarno dan Parti Komunis Indonesia serta dinaungi oleh Parti Komunis China untruk mengganyang Malaysia secara politik,diplomatic dan juga gerakan ketenteraan.Apakah ini pendirian seorang nasionalis ?.

Terdapat satu kecenderongan yang jelas dikalangan kumpulan ini terhadap kegiatan politik mereka yang lepas.Mereka yang panjang usianya sempat menulis memoir seperti Shamsiah Fakeh,Ahmad Boestamam,Abdullah C.D.Rashid Maidin dan Ibrahim Chik.Dalam tulisan-tulisan mereka,ternyata mereka mempertahankan tindakan mereka dengan lasan-alasan tertentu disamping memberi penafsiran tersendiri terhadap kegiatan mereka tanpa rasa bersalah, walaupun terasa benar mereka hanya `menegakkan benang basah'.Dipihak kerajaan pula Tengku Abdul Rahman banyak melahirkan pandangannya yang kemudian dibukukan bagi menjawab hala-hal politik dan sebagainya.Sekurang-kurangnya masyarakat mempunyai pelbagai pandangan untuk difikirkan.Namun untuk mereka yang tidak sempat menulis seperti Dato'Onn,Dr.Burhanuddin dan ramai lagi,mereka menjadi pejuang yang boleh diberi pelbagai interpertai oleh pelbagai pihak.

Walaupun begitu,Shamsiah Fakeh dan bekas suaminya Ahmad Boestamam bersikap jujur dalam memberitahu kegiatan –kegiatan politik mereka.Ahmad Boestamam misalnya dalam bukunya **Merintis Jalan Kepuncak** mengaku bahawa PKMM ditubuhkan atas inisiatif Parti Komunis Malaya di Town Hall,Ipoh.Shamsiah Fakeh juga mengaku ia datang ke Jakarta untuk menubuhkan sebuah **Liga Pembebasan Malaya** untuk mencari lebih ramai orang Melayu menyokong gerakan komunis.Namun, dia tidak memberitahu tentang gerakan Ganyang Malaysia yang dikestrakan oleh Parti Komunis Indonesia setelah Parti Komunis Malaya kecundang dalam perjuangannya apabila Persekutuan Tanah Melayu diistiharkan bersejajir dari pengaruh PKM pada 1960;Darurat ditamatkan pada tarikh tersebut.Itulah juga tarikh idea Malaysia mula dilaksanakan oleh British melalui Tengku Abdul Rahman dan PTM yang dilihat telah dapat mengatasi

pengaruh Kominis. Maka satu tugas baru diberi kepada Tengku iaitu menubuhkan Malaysia dengan alasan menolak kominis dari bertapak di Singapura akibat kemenangan Barisan Sosiali mencabar PAP dan Lee Kuan Yew. Pihak Barat tidak mahu kominisme mencari tapak baru di kepualauan Asia Tenggara ini.

Kesemua perkembangan politik ini tidak dihuraikan oleh Shamsiah dalam memoirnya. Saperti juga memoir-memoir lain, tokoh-tokoh itu tidak akan bercerita tentang keburukannya; tetapi menceritakan sesuatu yang manis dan menarik. Kadang-kadang ada yang bersifat retorik dan memusingkan cerita saperti Chin Peng dan Abdullah C.D. yang menulis bahawa mereka adalah perajurit-perajurit yang membebaskan lantas memerdekakan Persekutuan Tanah Melayu. Pandangan dan tulisan mereka ini mudah dipercayai oleh sesetengah generasi hari ini tanpa membaca dan meyelidikinya melalui bacaan yang lebih luas lagi. Sejarah dikatakan ditulis oleh orang menang, tetapi pada hari ini orang-orang yang kalah dalam perjuangannya saperti PKM, PKMM, API dan AWAS pula menulis sejarah seolah-olah mereka adalah orang yang menang dalam perjuangannya. Dengan itu ternyata tujuannya menulis adalah untuk menegakkan kemenangan moralnya walaupun fakta-fakta sejarah telah ditunggang- tebalikkan. Kalau Karl Marx memang berniat membela proletariat atau golongan tertindas tetapi janganlah pula yang tertindas itu menjadi pembohong, mengeneipkan nilai-nilai murni serta menafikan fakta-fakta sejarah. Memang kebenaran itu subjektif tetapi dasar-dasar kebenaran tetap ada untuk direnungkan.